

KO E KALAI SI MO'UÍ

KO E FAKAMO'ONI 'A E KAU 'APOSETOLÓ

KO E SIASI 'O SĪSŪ KALAI SI 'O E KAU MĀ'ONĪ'ONĪ 'I HE NGAHI 'AHO KIMUI NĪ

I he'etau fakamanatua hono 'alo'í 'o SĪsŪ Kalaisi he ta'u 'e uaafē kuo hĪlĪ, 'oku mau fakahoko atu ai 'emau fakamo'oni ki he mo'oni 'o 'Ene mo'ui ta'e ma-fakatatauá, pea mo e haohaoa 'o 'Ene feilaulau fakalelei ma'ongo'ongá. Kuo te'eki ke 'i ai ha taha kuo 'i ai hano mālohi pehē kia kinautolu kotoa kuo mo'ui, pe 'e mo'ui he funga 'o māmaní.

Ko e Sihova Ma'ongo'onga ia 'o e Fuakava Motu'á, ko e MĪsaia ia 'o e Fuakava Fo'ou. Fakatatau mo e fakahinohino 'a 'Ene Tamaí, na'á Ne hoko ai ko e Tupu'anga 'o e māmaní. "Na'e ngaahi 'e ia 'a e me'a kotoa pē; pea na'e 'ikai ha me'a 'e ngaahi kae 'iate ia pē" (Sione 1:3). Neongo na'e 'ikai ha'ane angahala, ka na'e papitaiso Ia ke fakakakato 'a e mā'oni'oni kotoa pē. Na'e "fa'a fe'aluaki 'o fai lelei" (Ngāue 10:38), ka na'e fehi'anekina ai ia. Ko 'ene ongoongolelei ko ha pōpoaki ia 'o e melino mo e 'alo'ofa. Na'á ne kōlenga 'a e taha kotoa ke muimui ange 'i He'ene sĪpingá. Na'á Ne fononga foki 'i he ngaahi hala 'o Pālesitainé, fakamo'ui 'a e mahakí, faka'á a e kuí, pea mo fokotu'u 'a e maté. Na'á ne ako'í hono mo'oni 'o 'itāniti, 'a hono mo'oni 'o 'etau tomu'a mo'ui ki mu'a 'i he te'eki ke 'i ai 'a e māmaní, 'a e taumu'a 'o 'etau mo'ui 'i he māmaní, pea mo e malava ke tau hoko ko e ngaahi foha mo e ngaahi 'ofefine 'o e 'Otuá, 'i he mo'ui ka hoko maí.

Na'á Ne fokotu'u 'a e sākalamēniti ko ha fakamanatu 'o 'Ene feilaulau fakalelei ma'ongo'ongá. Na'e puke pōpula ia pea tukuakí 'i ha ngaahi me'a loi, pea tautea ia ke fakatōliai 'a e kau fakatangá, pea tautea ai ke ne pekia 'i he kolosi 'i Kalevalé. Ne Ne foaki 'Ene mo'ui ko ha fakalelei ki he ngaahi angahala 'a e fa'ahinga 'o e tangatá kotoa. Ne hoko ia ko ha me'a'ofa -ma'ongo'onga ko e fakafofonga 'o e kakai kotoa pē 'e faifaiangé pea mo'ui 'i he funga māmaní.

'Oku mau fakamo'oni 'i he loto mālu'ia ko 'Ene mo'ui, 'a ia 'oku mahu'inga fau ki he hisitōlia kotoa 'o e tangatá, na'e 'ikai kamata ia 'i Pētelihema pe 'osi 'i Kalevale. Ko e 'Alo Lahi Taha ia 'o e Tamaí, ko e 'Alo pē Taha ne Fakatupu 'i he kakanó, ko e Huhu'í 'o e māmaní.

Na'e toetu'u ia mei he fa'itoká ke ne "hoko ia ko e 'uluaki fua 'o kinautolu na'e mohé" (1 Kolinitó 15:20). 'I He'ene hoko ko e 'Eiki kuo Toetu'u, ne 'a'ahi ai ki he lotolotonga 'o kinautolu Ne 'ofa ai 'i he mo'ui ní. Na'e toe ngāue foki 'i he lotolotonga 'o 'Ene "fanga sĪpi kehe" (Sione 10:16) 'i he kuonga mu'á 'i 'Amelika. 'I hotau kuongá ni, ne hā ai mo 'Ene Tamaí ki he ki'i tamasi'i ko Siosefa

Sāmítá, 'o ne fakafē'ao mai ai 'a e tala'ofa ko ia ne fai fuoloa ko e "kuonga 'o e kakato 'o e ngaahi kuongá" ('Efesō 1:10).

Na'e fakamatala'i 'e he Palōfita ko Siosefá 'a e Kalaisi Mo'ui 'o pehē: "Na'e tatau 'a hono ongo fofongá mo e ulo 'o e afi; na'e hinehina 'a e lou'ulu 'o hono 'ulú 'o hangē ko e sinou ma'a; na'e ulo hono fofongá 'o mahulu ange 'i he ngingila 'o e la'aá; pea na'e tatau hono le'ó mo e tafe mālohi 'o e ngaahi vai lahi, 'io 'a e le'ó 'o Sihová 'oku pehē:

"Ko au ko e 'uluaki mo e ki mui; ko au ia 'a ia 'oku mo'ui, ko au ia 'a ia na'e fakapōngi; ko homo taukapo au ki he Tamaí" (T&F 110:3-4).

Na'e toe pehē foki 'e he Palōfita fekau'aki mo Ia: "Pea ko 'eni, hili 'a e ngaahi fakamo'oni lahi kuo fai 'o kau kiate Iá, ko e fakamo'oni fakamuimui taha 'eni 'okú ma fai 'o kau kiate Iá: 'Okú ne mo'ui!

"He ne ma mamata kiate Ia, 'io, 'i he nima to'omata'u 'o e 'Otuá; pea ma fanongo ki he le'ó 'oku fakamo'oni'í ko e 'Alo pē Taha ia na'e fakatupu 'e he Tamaí—

"Pea kuo fakatupu, pea na'e fakatupu 'a e ngaahi māmá 'e ia, pea 'iate ia, pea meiate ia, pea 'oku fakatupu 'a hono kakai 'o iá, ko e ngaahi foha mo e ngaahi 'ofefine ki he 'Otuá" (T&F 76:22-24).

'Oku mau fakaha'i 'i he lea fakamātoato kuo 'osi fakafoki mai Hono lakanga fakataula'eikí mo Hono Siasí ki he funga māmaní — "pea kuo fokotu'u ki he tu'ungá . . . 'a e kau 'apostolo mo e kau palōfita, ko hono fu'u makatulikí 'a SĪsŪ Kalaisi pē" ('Efesō 2:20).

'Oku mau fakamo'oni 'e 'i ai 'a e 'aho 'e toe hā'ele mai ai ki he māmaní, "Pea 'e fakahā 'a e nāunau 'o [e 'Eikí], pea 'e mamata ki ai 'a e kakai kotoa pē" ('Īsaia 40:5). Te Ne pule ia ko e Tu'i 'o e Ngaahi Tu'i mo e 'Eiki 'o e Ngaahi 'Eiki, pea 'e peluki 'a e tui kotoa pē, mo vete 'a e 'elelo kotoa 'i he'enau hū kaite Iá. Te tau tu'u takitaha kotoa pē ke Ne fakamāu'í 'o fakatatau mo 'etau ngaahi ngāué pea mo e ngaahi holi 'a hotau lotó.

'Oku mau fakamo'oni, 'i he'emau hoko ko 'Ene kau 'Apostolo mo'oni kuo 'osi fakanofó — ko SĪsuú ko e Kalaisi Mo'ui Ia, ko e 'Alo ta'e fa'amate 'o e 'Otuá. Ko e Tu'i Ma'ongo'onga ia ko 'Imānuelá, 'oku tu'u he 'ahó ni 'i he to'omata'u 'o 'Ene Tamaí. Ko Ia 'a e maama, mo e mo'ui, pea mo e 'amanaki lelei'anga 'o e māmaní. Ko Hono 'alungá, ko e hala ia 'oku fakatau ki he fiefia 'i he mo'ui ko 'ení pea mo e mo'ui ta'engata 'i he maama ka hoko maí. Fakafeta'i ki he 'Otuá 'i He'ene me'a'ofa ta'e ma-fakatatau mai 'aki Hono 'Alo fakalangí.

KO E KAU PALESITENISĪ 'ULUAKÍ

Thomas M. Morgan
James H. Fara

'Aho 1 'o Sānuali 2000

KO E KŌLOMU 'O E KAU 'APOSETOLO 'E TOKO HONGOFULU MĀ UÁ

Boyd H. Tucker
L. Tompkins
Donna B. King
Neal A. Young
Russell M. Nelson
Dallin H. Oaks

M. Russell Ballard
Joseph B. Wirthlin
Richard G. Scott
Stewart D. Hobbs
Jeffrey R. Holland
Benny A. Eyring